

Halidovo veče za pamćenje u Banjaluci

Više od 4.000 posjetilaca duže od dva i po sata pjevalo je najveće Bešlićeve hitove. Koncert je organizovala firma "Renis" d.o.o., a generalni sponzori bili su BH Telecom i Fabrika duhana Sarajevo.

U proteklih 20 godina Bešlić se u gradu na Vrbasu pojavljivao na manifestacijama dodjele Oskara popularnosti, gdje ga je publika svake godine euforično dočekivala. Nakon dvije decenije, Halid Bešlić održao ponovo solistički koncert u Banjoj Luci.



Uzvici oduševljenja prepune banjalučke Sportske dvorane "Borik" dočekali su Bešlića kada se popeo na binu uz prve taktove hita "Dvadesete". Publika je zapjevala s legendarnim pjevačem i nastavila sve do kraja koncerta koji su čekali skoro dvije decenije i za koji su karte bukvalno "planule".

Halidov koncert obilježila su i gostovanja petorice njegovih kolega, a najveće iznenađenje bio je Massimo Savić.

- Kada biram goste za svoje nastupe uvijek se vodim logikom da to budu ljudi koji će na koncert dovesti i publiku koja inače ne bi došla da me sluša. Tako u publici bude i nekoliko stotina onih koji ne slušaju moju muziku - izjavio je Halid.



Pjevač koji je ne tako davno doživio tešku saobraćajnu nesreću, pokazao je kako s pjevanjem nema nikakvih problema, ali i da ga atmosfera prepune dvorane može bez problema zadržati na bini duže od dva i po sata, koliko je koncert trajao.

